



Thomas Deragisch

25 da decembre 1915 - 16 d'uost 2001

La notg da Nossadunna d'uost, ils 15 sin ils 16 d'uost ha il Tutpussent clamau tier El siu fideivel survient, nies car aug Thomas Deragisch.

Igl aug Thomas ei naschius a Sedrun/Gonda ils 25 da decembre 1915 sco siatavel da 9 affons ord la lètg da Gion Antoni Deragisch e Maria Benedicta Deragisch naschda Venzin.

La veta dil trapassau ei buca stada ina veta da grondas bahaultschas. Suenter las scolas da vischuna ha ei giu num semetter ladi-namein alla laver per segidar cun la famiglia, quei che secapeva da gliez temps tut da sez empau en scadina famiglia.

All'entschatta deva ei paucas pussevladads, auter che da survir al puresser. Quei ei stau il cass sco fumegl tier differents purs denter auter a Segnas e lu era a Hospital. Era ei igl aug Thomas staus enzatgei ad alp. Pli tard ei la laver sil sectur da baghegjar stada ina buna fadigia e quei denter auter sco manual duront las lavurs d'erecziun dallas ovras electricas Reinanteriur.

Pli tard ha lu il frar Vincenz procurau per el ina plaza a Turitg tier il marcau nua ch'igl aug ha giu paun e fadigia entochen sia pensiun.

La beinmeritada pensiun ha igl aug lu passentau ella casa s. Vigeli entochen il di da sia mort. Era sche la vesida e l'udida han disdiu malamein ha igl aug saviu guder biars dis ed onns ella casa s. Vigeli e quei tier in bien tractament e buna tgira. Cheutras lessel jeu admetter a survientas e survients sco era agl administratur per la buna tgira in sincer Dieus paghi. In grond engraziamet lessel jeu era admetter a tut tgi che ha fatg dil bien sin ina ni moda l'autra al Thomas en sia veta.

Nus lein sperar ch'il Tutpussent hagi fatg grazia cul defunct e nus recumandein el a Vossa oraziun e memoria.

Car aug ruaussa en pasch!